

Marie Vrålstad og Øystein Hole
Kossdalsvegen 33
5282 Lonevåg

29. november 2020

Osterøy kommune
Postboks 1
5293 Lonevåg

Kopi til Fylkesmannen

Klage på endeleg vedtak -Plansak 46302015003 – Detaljregulering Hosanger næringsområde – Holedalen – Mjøsvågen – Hosanger

Me viser til kunngjeringa av endeleg vedtak, datert 5. november 2020, og klagar på vedtaket.

I vedtaket for utviding av eksisterande næringsområde knytt til Mjøs Metallvarefabrikk AS i Hosanger, er delar av vår eigedom innlemma i næringsområdet.

Me ser inga grunn til, og har heller inga interesse av, at noko av vår eigedom skal liggje innanfor grensene til næringsområdet. Me krev at næringsområdet vert trekt heilt vekk frå vår eigedom. Den delen av vår eigedom som i planteikninga er innanfor næringsområdet, vert i dag nytta som utmarksbeite for geitene våre. Eit næringsområde på vår eigedom vil komme i sterk konflikt med garden sine egne næringsinteresser.

Frå me flytta til Hole i 2003 har me utvikla og opparbeidd garden, som ikkje hadde vore i drift på 20 år. Etter 2 år kjøpte me tilleggsgjord i form av innmarka og utmarka til nabobruket, som hadde lege brakk i endå lengre tid, og utvida dermed garden sitt areal til omkring det dobbelte. Etter mykje planlegging, vart det i 2011 investert og satsa stort, då nytt fjøs og eget gardsysteri vart bygd. Me driv i dag mjølkeproduksjon med geiter, og produserer lokalmat i form av brun geitost og spekepølser av geit og hjort, under merkevara Hole gard.

Me har i alle år frå me kom til bygda, arbeidd aktivt mot å få ein større og levedyktig gard. I dag er garden ein av få gardar som er i drift i Hosanger. Med over eitt årsverk på garden er den også den einaste garden i bygda som gir fulltidsarbeid. For å kunne drive garden, treng me all den utmarka og innmarka me har i dag, og gjerne meir til. I dag slår me andre gardar for å få nok fôr, og me ynskjer ei utviding av garden på lengre sikt, slik at garden skal vere drivverdig også for komande generasjonar.

Hole Gard er i positiv utvikling, og har no 2 tilsette i faste stillingar, i tillegg til eigar som arbeider fulltid ved garden. Hole Gard vert også nytta i pedagogisk samanheng, og Hosanger Montessoriskule og andre lokale skular har i mange år nytta garden som ein læringsarena for elevar.

Det er også verdt å merke seg at innanfor næringsområdet som ligg på vår eigedom, er det fleire verneverdige steingardar som er i god stand. Desse bør framleis liggje som dei gjer i dag.

Me vonar de vil ta omsyn til at me ikkje ynskjer at noko av eigedomen vår skal liggje innanfor grensene til Hosanger næringsområde, og at planen vert endra.

Med helsing

Marie Vrålstad

Marie Vrålstad

Øystein Hole

Øystein Hole